

Radøy kommune

Saksframlegg

Saknr	Utval	Type	Dato
037/2019	Formannskapet i Radøy	PS	19.09.2019

Sakshandsamar	Arkivsaknr.:	Dokumentnr.:
	19/363	19/13025

Prosjekt- og aktivitetsstøtte - kulturmidlane - tildeling haust 2019

Saksopplysingar:

Bakgrunn

Radøy kommune har gjort endringar i tildeling av prosjekt- og aktivitetstilskot frå kulturmidlane. Tidlegare vart kvar søknad vurdert og handsama fortløpande. I år vert midlane fordelt to gonger i året. Det er 30.000 kroner til fordeling i begge søknadsrundane.

Kommunale kulturmidlar kan gjevast til lag, foreiningar og organisasjonar som har sitt virke i Radøy kommune. Regionale organisasjonar og fylkesorganisasjonar kan få tilskot dersom midlane vert øyremerkt verksemd i Radøy kommune, og det ikkje finst lag i kommunen som ivaretar denne aktiviteten. Det er då ein føresetnad at organisasjonen har medlemmer som er busette i Radøy kommune.

Det er 30 000 kroner til fordeling i prosjekt- og aktivitetstilskot i haust.

Tilskot kan gjevast til opne kulturarrangement og –prosjekt, og til innkjøp av utstyr. Arrangement og prosjekt som er nyskapande vert prioriterte. Tilskotet er behovsprøvd og kan gjevast som:

- Underskotsgaranti
- Direkte tilskot

Retningslinene seier at aktivitetar for barn og unge skal prioriterast. I tillegg skal aktivitetar som femnar om menneske med nedsett funksjonsevne og tiltak som fremjar integrering prioriterast.

Desse har søkt om tilskot:

Hella bedehus: I sommarferien inviterer Hella bedehus alle til å vera med på leir. Laget betaler kvart år heilt eller halvt for mange, så ikkje familieøkonomi skal vera avgjerande. Hella bedehus skriv i søknaden at dei ser det som viktig å skapa sosialt samver og opplevingar for mange barn. Laget seier også at dei har behov for utstyr til aktivitetane sine for barn. I søknaden vert det peika på at trongen for høveleg utstyr er stort når inntil 40 born i alderen 7-13 år skal aktiviserast samstundes.

Dette er etter administrasjonen si vurdering eit viktig tiltak i denne krinsen. Radøy kommune har tidlegare ikkje gitt tilskot til leiropphald, og den praksisen blir ført vidare også ved denne tildelinga.

Det vert søkt om til saman kr 10 000,- i støtte.

Manger skulemusikklag: Skulekorpset søker om tilskot til eit korpsetutvikling-prosjekt over to dagar. Deltakarane er frå 5-8.trinn. Målet er å integrera dei eldste i juniorkorpset med dei yngste i hovudkorpset. Gode relasjonar bidrar til rekruttering og forebygger fråfall, vert det skrive i søknaden.

Tilskotet skal brukast til noteinnkjøp, mat og instruksjon. Instruksjonen denne helga er utover den daglege drifta.

Manger skulemusikklag skriv i søknaden at det er viktig å tenkja nytt og langsiktig om korpset framleis skal halda seg i Norgestoppen.

Administrasjonen synest det er positivt at det vert satsa på denne type aktivitetar, som er viktig i rekrutteringsarbeidet og i arbeidet med å halda musikantane i eit godt miljø.

Det vert søkt om kr 10 000 i prosjekt- og aktivitetsstøtte.

Radøy bokseklubb: Bokseklubben søker tilskot til å ha eit gratis nybegynnarkurs i boksing for ungdom i alderen 13-18 år. Kurset skal gå over to helger i november og skal vera eit tilbod til ungdom i heile Nordhordland.

Bokseklubben skriv i søknaden at kurset vil gje ungdommane introduksjon til idretten, samtidig som dei vil få prøvd det nok ut til at dei kan finna ut om dette er noko dei ønskjer å fortsetja med. Det vert peika på at utstyret som blir kjøpt inn i samband med kurset, vil koma godt med for vidare drift av klubben. Radøy bokseklubb arbeidar for å kunne tilby eit fast tilbod innan kampsport for alle i den nye Alver kommune.

Administrasjonen legg vekt på at Radøy bokseklubb er eit alternativ tilbod til ungdom i Radøy.

Det vert søkt om kr 19 900,- i prosjektstøtte til Radøy bokseklubb.

Manger musikklag: Manger Musikklag (MML) og dirigent Bjørn Sagstad inviterer til "Kassiske Perler" i Knarvik kyrkje 15.mars 2020. MML har med seg Rune Alver, Lydia Hoen Tjore og Erlend Aagaard Nilsen på konserten, der det vert servert "Klassiske Perler".

Denne konserten er ei storsatsing av MML. Korpset skriv i søknaden at det krev mykje å halda ein konsert med fleire av dei fremste musikanane me har i Nordhordland. Rune Alver ønskjer mellom, anna å gjere Signe Lund sin klaverkonsert saman med MML. Det krev ein del tilrettelegging og arrangering for at det skal verta mogleg å spela for brassband. Mykje av dette arbeidet vil verta gjort på dugnad, men noko av eit eventuelt tilskot vil gå til arrangering av musikk, resten til arrangementskostnader, som husleige og annonsering.

Administrasjonen ser det som prisverdig at MML tar på seg slike prosjekt. Konserten skal haldast i Knarvik og dermed fell denne søknaden utanfor retningslinjene for tilskotsordninga. Konserten skal haldast i mars neste år, og då vil det vera aktuelt å søkja Alver kommune om tilskot.

Det vert søkt om kr 30 000 i prosjekt- og aktivitetsstøtte.

Radøy seniordans: Radøy seniordans søker om prosjekt- og aktivitetsstøtte til aktivitetane sine. RS arrangerer seniordans kvar måndag i ungdomshuset Solvang både haust, vinter og vår, med eit frammøte på mellom 20 og 30 personar.

Radøy seniordans har lenge hatt eit ønske om å gå til innkjøp av eit trådløst høgtalaranlegg,

som danseleiarane kan bruka. Det kan til tider vera vanskeleg å høyra danseleiarane. Det vert i søknaden vist til at andre danselag i andre kommunar har slike anlegg. RS har også felles arrangement med nabokommunane to-tre gonger i året.

Det vert opplyst at eit trådløst høgtalaranlegg kostar kr 4200,-.

RS har også ein PC der dansemusikken er lagra, og denne begynner å bli gamal og må etter kvart skiftast ut. Prisen på ny PC vil vera kr 3500 – 4000,-.

Administrasjonen ser dansekveldane for seniorane våre som eit positivt tiltak.

Manger idrettslag – bocciagrappa har søkt om prosjekt- og aktivitetsstøtte til familieturneringar i boccia. Denne søknaden vert handsama i tilskotsordning for inkludering og integrering.

Saka er sendt til Radøt musikkråd, Radøy idrettsråd og ungdomsrådet til uttale.

Musikkrådet støttar administrasjonen si innstilling. Uttale frå idrettsrådet og ungdomsrådet vil bli ettersendt.

Konklusjon

Administrasjonen har lagt vekt på å få til ei jamn fordeling av midlane, med unntak av bokseklubben, som får litt meir enn dei øvrige. Bokseklubben har ikkje tidlege fått prosjekt- og aktivitetsstøtte og dei representerer eit viktig alternativ tilbod for ungdom.

Rådmannen sitt framlegg til vedtak:

Radøy kommune gir følgjande prosjekt- og aktivitetsstøtte ved fordeling hausten 2019:

Hella bedehus kr 7000,-

Manger skulemusikklag kr 7000,-

Radøy bokseklubb kr 9000,-

Radøy seniordans kr 7000,-

Manger musikklag får ikkje prosjekt- og aktivitetsstøtte til konserten i Knarvik i mars 2019.

Formannskapet i Radøy - 037/2019

FS - handsaming:

Formannskapet vedtok samrøystes rådmannen sitt framlegg til vedtak.

FS - vedtak:

Radøy kommune gir følgjande prosjekt- og aktivitetsstøtte ved fordeling hausten 2019:

Hella bedehus kr 7000,-

Manger skulemusikklag kr 7000,-

Radøy bokseklubb kr 9000,-

Radøy seniordans kr 7000,-

Manger musikklag får ikkje prosjekt- og aktivitetsstøtte til konserten i Knarvik i mars 2019.

Vedlegg:

Hella bedehus _ søknad om prosjekt- og aktivitetstilskot

Hella bedehus søknad - kostnader

Manger skulemusikklag _ søknad om prosjekt- og aktivitetstilskot

Manger skulemusikklag rekneskap 2018_ budsjett 2019

MML budsjett konsert

MML rekneskap 2018

Radøy bokseklubb Søknad om prosjekt- og aktivitetstilskot

Søknad om tilskot - Radøy seniordans (L)(311512)

Manger IL _ bocciagrappa _ prosjekt og aktivitetsstøtte

Uttale Radøy musikkråd